

uno altro dovea vegnir orator a la Signoria, ma poi ave letere che 'l soprastesse; et quel citadin fo in rocha, non vete nessuna preparation, si che si tien il re non verà questo anno in Italia, e non venendo, non sarà altro.

Di Ravena, mandano una letera dil Moro, castelan di Russi. Dil zonzer li dil marchexe di Mantoa, va a trovar il papa, con 150 cavalli armati, con le celadine in testa, e il marchexe è con le balestre charge su la cossa; e fo a dì 9. *Item*, di altri successi di quelli lochi, *ut in litteris*; et è voce de li, il papa torà l'impresa di Rimano o Sojano.

Di l' orator in corte, date a Orvièto, a dì 9. Come il papa partiva. Et era stato li Zuan Paulo Bajon; el papa li fè rebuffo, poi aquietò le cosse, si che sarà con soa santità. E par il duca di Urbin se interpose; e il papa va al lago di Perosa a veder la monstra di le zente d'arme di dito Zuan Paulo Bajon, à 100 homeni d'arme, *etiam* di le zente di Zuan di Saxadello; et a dì 13 intrarà im Perosa. *Item*, si aspeta il cardinal di Narbona, vien di Franza dal papa.

192 Fu posto, per li consieri, uno salvo conduto a uno altro todesco di potersi acordar; et fu preso.

Fu posto, per li savij, et sier Antonio Trun, consier, dar a do di Corfù, qualli suo padre fonno causa dar 6 Strivalli a la Signoria *etc.*, certo sal di Corfù, per uno al mexe di provision, che valgia ducati 9 al mese, *ut in parte, videlicet* mozeti 250. Et sier Hironimo Capello contradise; li rispose sier Antonio Trun. Et andò la parte; et fu presa.

Fu posto, per li savij, che la nave di sier Alvise Zustignan, *quondam* sier Marco, e compagni, qual fo comprà per condur formenti qui, et è forestiera, che la se intendi venetiana, pagando il consueto; fu presa.

Fu posto, per i savij, che si dagi di più, di la camera di Nichosia a Famagosta, ducati 200 al mese, si che habino ducati 500 al mexe, per la fabbrica. Contradise sier Antonio Condolmer, stato synico in Cypro, dicendo saria bon far uno colateral, che facesse le bollete, dicendo: È mal, uno Philipo da Milan è quello fa il tutto; li rispose sier Piero Balbi, savio dil consejo; et fu presa.

Fu preso *etiam* di Zerines per la fabbrica darli di più; et fu *etiam* altra parte di Cypro posta, non da conto.

Item, dar a uno cyprioto certo alpato (*sic*) de li per anni 5.

Fu preso, per sier Anzolo Trivixan, consier, di proveder a l'arsenal, et che 'l sia electi tre honore-

veli patroni, *videlicet* uno in loco di sier Zacaria di Prioli, à refudà, e poi li altri, con ducati 35 al mexe neti per spexe, non possino esser tolti se non procuratori, sentino in colegio a presso li savij dil consejo, al bancheto basso, possino meter parte, lete prima in colegio, et possino a l'horo requisition dimandar pregadi a la Signoria. *Item*, quello è a la cassa, stagi a l'arsenal e vadi a torno *etc.*, *ut in parte*. E li savij dil colegio, et sier Antonio Trun, consier, messeno a l'incontro, dar ducati 2000 a l'arsenal, come fu preso, quando fo messo il 3.º di tansa, di qual si mandi parte a comprar canevi a Montagnana e Bologna, e parte a comprar legnami *etc.* Parlò per la soa parte sier Anzolo Trivixan; li rispose sier Antonio Trun. Et andò le parte: 35 di sì, il resto di savij; e questa fu presa.

Fu posto, per li savij, certa parte longa dil saldar di le casse, che Domenego Ceja habi boletin di li compagni di l'oficio haver saldà la cassa, *aliter* non li cori la contumacia, nè comenzi. *Item*, non si fazi più sconti per li officij, ma tutti li danari vengino a li camerlengi, dove se fazino li le partide *etc.*, *ut in ea*; presa.

A di ante dicto, fo sepolto frate Honorio, di 192* l'hordine di San Domenego; di nazione da Braxa, et era confessor dil doxe presente, homo di grande auctorità, perhò che 4 frati era, qualli in molte cosse se impazavano, *videlicet* questui, fra' Bortolo Dalza, di San Piero Martire, fra' Lodovico di Chioza, di San Francesco da la Vigna, et fra' Mansueto di Santa Maria di Gratia.

A dì 13. Fo gran consejo. Fato avogador di comun, in luogo di sier Marco Dandolo, dotor et cavalier, che à refudà, per esser dil colegio di le aque, sier Zuan Corner, è di pregadi, *quondam* sier Antonio.

Fo publicato, per Zuan Jacomo, secretario dil consejo di X, do parte, prese nel consejo di X, *videlicet* una a dì 9 di l'istante, che una condanason, fata contra sier Piero da Canal, *quondam* sier Luca, era camerlengo a Vicenza, qual per aver tolto danari di quella camera, di qualli ne era aspetanti al consejo di X, et absente, citato su le scale, è stà processo, che 'l dito sier Piero sia bandizato im perpetuo di tutti officij e beneficij di la Signoria nostra, si dentro come di fuora; e se in termine di uno mexe non haverà pagato, o ver asegurato la Signoria di lire 3552 e pizoli . . . che tanti à tolto, sia *tunc* bandizato im perpetuo di Venetia e di tutte (*sic*) (*terre?*) e luogi di la Signoria nostra, e de' navilij armadi e desarmadi, e venendo in le forze, habi che 'l prenderà,